



Pleiv s. Gions Mustér
Rapport da gestiun 2008

Impressum

Editura: Pleiv. s. Gions Mustér

Ediziun: 1050 exemplars

Fotografia 1. pagina: baselgia parochiala s. Gions (G. Tenner)

© 2009 Pleiv s. Gions Mustér

Invitaziun alla radunonza generala dalla Pleiv sogn Gions/Mustér:

venderdis, ils 8 da matg 2009 allas 20.15 uras,
halla communal a Cons/Mustér

Tractandas:

1. Elecziun da dus dumbravuschs
2. Protocol dalla radunonza generala dils 18 d'avrel 2008
3. Rapport dil president dalla pleiv
4. Rapport dalla presidenta dil cussegl pastoral
5. Rapport dil president dalla caplania Segnas
6. Rapport da quen: Baselgia e pervenda da s. Gions
7. Rapport dils revisurs da quen e scarica alla suprastonza
8. Elecziuns:
 - a) ugau-baselgia
9. Preventiv e fixar il pei da taglia
10. Eventualmein damonda da credits
11. Undraziuns
12. Varia

La suprastonza selubescha da porscher als presents alla fin dalla radunonza in sempel refrestg. Cordial invit a nossa radunonza generala.

Per la suprastonza dalla pleiv sogn Gions/Mustér:

Il president:
Otto Gienal

La vicepresidente:
Jris Lombris

Protocol dalla radunonza generala dalla Pleiv s. Gions/Mustér

venderdis, ils 18 d'avrel 2008, allas 20.15 uras en balla Cons/Mustér

Tractandas:

1. Elecziun da dus dumbravuschs
2. Protocol dalla radunonza generala dils 20 d'avrel 2007
3. Rapport dil president dalla pleiv
4. Rapport dil president dil cussegl pastoral
5. Rapport dil president dalla caplania Segnas
6. Rapport da quen: Baselgia e pervenda da s. Gions
7. Rapport dils revisurs da quen e scarica alla suprastonza
8. Elecziuns:
 - a) president
 - b) ulteriurs commembers da suprastonza
 - c) revisurs da quen
 - d) cussegl pastoral
9. Presentaziun: Nova lescha da taglia per la pleiv roman-catolica da Mustér
10. Votaziun lescha da taglia
11. Preventiv e fixar il pei da taglia
12. Damonda da surprender igl emprest che la caplutta da Mompé Tujetsch ha tier la Missiun interna
13. Undraziuns
14. Varia

Il president dalla pleiv Otto Gienal beneventa ils presents all'ordinaria radunonza generala. L'invitaziun ei vegnida repartida a dretg temps e la gliesta da tractandas vegn approbada senza midadas.

Perstgisas: Ignaz Deflorin-Berther, Roger Tuor e Heinrich Berther.

1. Sco dumbravuschs vegnan proponi ed elegi Hans Huonder e Marcus Jacomet.
2. Il protocol dalla radunonza generala dils 20 d'avrel 2007 vegn approbaus senza midadas cun engraziament all'actua.

3. Il rapport annual repartiut en mintga casada da nossa pleiv ensiara la lavur essenziala prestada dils commembers da suprastonza e dil cussegl pastoral. El enumerescha ils fatgs da muntada vitala per nossa pleiv. Il president serestrenscha perquei sin entgins puncts essenzials:

Fastedis fa alla suprastonza sco gia ils onns precedents la pastoraziun. El decuors digl onn 2009 contonscha nies plevon Alexi Manetsch la vegliadetgna da pensiun e siu giavisch ei da descargar sesez empau. In emprem pass ei gia fatgs, silla fin october 2008 ha sur Alexi visau la pastoraziun ellas pleivs da Sumvitg, Surrein e Rabius. Era quei che pertucca igl engaschi da sur Benny semuossan certas midadas, igl ei denton aunc memia baul dad ofniar e metter en curella mo mesas caussas.

In ulteriur problem ei l'instrucziun religiosa da nos affons. La tematica vegn discussiunada sin palancau cantunal e regional. Lein sperar che tuttas stentas anfiien ina soluziun che cuntenta era nossas pleivs.

Il davos onn da scola ha l'instrucziun religiosa sil scalem superiur fatschentau nus pulitamein. Ton ina part dils giuvenils, mo era geniturs valeteschan l'instrucziun religiosa el caum da pouca muntada, quei che facilitescha in summa buc l'instrucziun ed ha purtau grond malruaus e grondas discussiuns denter ils responsabels. Pigl onn



Survetsch divin da cumiau da sur Benny

vegnent semuossa denton ina buna sligiazium, duei la religiun vegnir dada dils scolasts da classa en fuorma dad uras d'etica.

Che perfin il respect viers nos bials e prezios edifecis sacralis maunca muossa il fatg d'in pign barschament el pierti baselgia. Nus sperein denton ch'il succediu seigi mo stau ina sviada singulara.

Dils trapassai da nosa pleiv vegn seregurdau en in cuort memento.

Nuota sempel eis ei d'anflar commembers per ils differents gremis dalla pleiv.

Alla fin da siu rapport engrazia il president all'entira cuminonza da pleiv per tut sustegn e la gronda lavur prestada.

4. Culla radunonza dad oz va il trienni dil cussegl pastoral 2005-2008 alla fin. Quei fatg pren il president dil cussegl pastoral sco raschun da dar in cuort sguard anavos sillas activitads dil cussegl pastoral dils davos 9 onns.

Avon 9 onns ei il cussegl pastoral seconstituus da niev cun praticamein tut novs commembers. Bernhard Petschen ha surpriu il presidi dil cussegl pastoral, Laurenzia Cajacob ei daventada menadra dil cerchel liturgic e Laurenzia Schnoz ha surpriu il cerchel social caritativ. Strusch surpriu la nov'incarica ha sur Sievi bandunau nosa pleiv.

Ils responsabels han denton buc schau pender il tgau ed ein ladinamein semess alla lavur. Els han surpriu differentas funcziuns en pleiv adossadas tochen lu al plevon. Igl'onn 2002 ei il diember da commembers dil cussegl pastoral vegnius sminuius ed igl'ei vegniu scaffiu in niev regulativ.

Il cussegl pastoral ha realisau bials survetschs divins specials, denter auter il survetsch divin culs Sontgaclus ni era la messa communabla cul convent dalla claustra. Plinavon han ins organisau differents referats cun tematicas actualas, p. ex cun pader Clau Lombriser, avat Daniel, bruder Franz, sur Ozioma e sgr. Victor Willi.

Il president fa era menziun dils viadis ch'il cussegl pastoral ha organisau per nos seniors ils davos onns.

Suenter 9 onns en uffeci remetta Bernhard Petschen siu post da president sco el veva gia informau avon in onn. Avon che bandunar il cussegl pastoral engrazia el cordialmein a tuts commembers dil cussegl pastoral, allas sut-gruppas dil cussegl pastoral, alla vischnaunca da Mustér sco era als consuprastonts dalla pleiv s. Gions per la biala e fritgeivla collaboraziun e tut sustegn.

5. Il rapport annual dalla caplania Segnas resumescha il curriu e passau en nies uclaun vischinont. Il president Gion Tenner menziunescha la renovaziun dil scaldament dalla baselgia da s. Roc e s. Bistgaun. Igl'atun 2006 han ins installau la nova centrala pil

scaldament. Grazia a quella han ils cuosts da scaldar saviu vegnir sminui considerablamein. Las cassas da metal ed ils manteners dall'escha han pitiu dalla humiditad ed han stuiu vegnir restaurai. Era ils mirs dalla casa pervenda ein vegni refrestgentai e sepresentan uss en bi vestgiu.

Alla fin suondan plaids d'engraziament a sur Pius Venzin, a sia casarina Matilda, a sur Alexi Manetsch, alla suprastonza dalla pleiv ed a tut quellas e quels che s'engaschan sin ina moda ni l'otra per la cuminonza da pleiv.

6. Igl ugau-baselgia Battesta Tschuor repassa cuortamein il quen dalla baselgia parochiala che siara cun in surpli d'entras da biabein frs. 16'000.-.

El sa menziunar che la baselgia da s. Placi hagi oz negins deivets pli. El engrazia a tuts che segidan sin ina moda u l'otra, cun plaid e cussegl, cun sustegn finanziel ni era cun segidar da lavar ora la baselgia.

Willi Lozza, ugau-pervenda, presenta medemamein il quen dalla pervenda che siara cun in bi surpli d'entras da rodund frs. 34'000.-.

7. Il revisur Paul Duff pren il plaid. Ils quens da tuttas baselgias e capluttas ein vegni revidi ils 7 da mars 2008. Ei vegn buca fatg diever dalla discussiun ed ils quens vegnan approvai unanimamein cun dar scarica als dus cassiers, alla suprastonza ed als augsegners ed engraziar a tuts per lur lavur. En num da tuts engrazia il revisur a tuts funcziunaris, quei che vegn attestau cun in ferm applaus.

8. Oz vegn l'entira suprastonza elegida pil proxim trienni. Il giavisch dalla suprastonza dalla pleiv ei da rumper quella tradiziun ord motiv che mintga cuminonza ha bugen sch'enzatgi el niev gremi ei enconuschents cun usanzas e fatgs succedi il davos temps. Perquei vegn mintga post occupaus separadamein: Otto Gienal vegn reelegius sco el giavischa per dus onns sco president, sco vice-presidenta Jris Lombris (3 onns), sco ugau-baselgia Battesta Tschuor (in onn), sco ugau-pervenda Willi Lozza (3 onns), sco representant da Segnas Gion Tenner (3 onns). Il post da president/a dil cussegl pastoral vegn occupaus enteifer il cussegl pastoral. Per quel vegnan reeligi: Laurenzia Cajacob, Laurenzia Schnoz, Josef Buschor, Giusep Caduff, Ermelinda Casanova, Giusep Duff e Marie Luise Deflorin. Francestg Cajacob vegn reelegius sco revisur da quen, sco successur da Paul Duff vegn elegius Roger Sac. Cordiala gratulaziun a tuts.

9. Il revisur Francestg Cajacob presenta la nova lescha da taglia per la pleiv ed arva la discussiun. Ils presents fan neginas damondas.

10. La nova lescha vegn approvada unanimamein.

11. Ils dus cassiers presentan ils preventivs per la baselgia e la pervenda che quantan cun in surpli da frs. 3'000.-, resp. frs. 9'000.-.

Tenor informaziuns dall'administraziun communal e la taglia da pleiv per 2008 aunc ligiada vid la taglia communal, naven da 2009 vegn la taglia baselgia ligiada vid la taglia sempli dil cantun, quei che munta ina sperdita per nossas entradas. Cun quei che la pleiv s. Gions stat momentan finanziamein bein fa la suprastonza la proposta da restar culla taglia da pleiv sin 12 %, quei pils onns 2008 e 2009. Quella vegn sustenida dils presents.

12. Ils 4 da matg 1995 ei vegniu suttascrit in contract d'emprest senza tscheins da frs. 50'000.- per la restauraziun dalla caplutta da Mompé Tujetsch denter la pleiv s. Gions e la Missiun interna. Tenor contract dueva quei emprést vegnir restituius suenter il 6avel onn en 5 ratas. Ord motivs buc enconuschents ei vegniu tralascchau da pagar anavos ad uras igl emprést. La pleiv da Baar ha susteniu la renovaziun cun frs. 10'000.- Ussa pretenda la Missiun interna che la pleiv restitueschi la summa restonta da frs. 40'000.- en 4 ratas da frs. 10'000.-.

Era a quella damonda dattan ils presents suatientscha.

13. En num dalla suprastonza honorescha Otto Gienal las suandontas personas per liung e fideivel engaschi per nossa pleiv:

- Bernhard Petschen, 9 onns president dil cussegl pastoral e commember dalla suprastonza dalla pleiv.
- Paul Duff, 15 onns revisur da quen.
- Giachen Riedi - biars onns ordinator a caschun da sepulturas.

A tuts treis vegn engraziu grondamein per tut engaschi e lavur prestada en favur da nossa cumuniona.

Era il president dil cussegl pastoral Bernhard Petschen astga honorar pliras dunnas per fideivels survetschs: Marcellina Giger, Agnes Deflorin e Mathilda Heini ein stadas 9 onns commembras dil cussegl pastoral, Adelina Gadola 7 onns. Prisca Solè e Karin Sac ein s'engaschadas plirs onns pil „Salid dil Segner“. Bernhard Petschen sco era Otto Gienal engrazian allas dunnas partentas per lur grond e nunstunclenteivel engaschi. Sco dapertut vala era cheu, pér cu la lavur vegn buc fatga pli sefan ins en tgei che manca.

14. Sco εμπрем pren sur Alexi Manetsch il plaid sut varia. El affirmscha l'abdicaziun sco plevon administratur dallas pleivs Sumvitg, Rabiis e Surrein sin d'atun proxim, quei ch'ei era vegniu acceptau digl uestg. Silsuenter dat sur Alexi in sguard anavos sin sui temps da pastoraziun che ha entschiet avon 37 onns giu Cuera. Ei suondan intensiv

onns a Rabius/Surrein e Sedrun avon ch'el ei vegnius elegius cheu a Mustér sco plevon. Cun quei ch'el festivescha in auter onn siu natalezi da 65 onns vess el il giavisch da saver reducir siu pensum sin ca. 70-80%. Sco ei vesi ora il mument vegni sur Benny pli probabel a surpender las pleivs da Sumvitg/Surrein e Rabius inaga per in onn. Sil territori dalla pleiv Mustér detti ei mintga jamna buca meins che 32 messas, 8 da quellas sonda e dumengia. El futur sappi ei tgunsch esser pusseivel ch'ins stoppi strihar enqualga ina u l'otra messa. Alla fin engrazia sur Alexi a tut quels ch'ei segidai e segidan vinavon cun el ella pastoraziun.

El admetta in special engraziament al president partent dil cussegl pastoral Bernhard Petschen per tut sia lavur ch'el ha prestau ils davos nov onns.

Ina parochiana vul saver daco che las pleivs da Surrein, Sumvitg e Rabius hagian gia communicau officialmein che sur Benny surprindi culs 1 da november quellas pleivs. Han ils parochians da Mustér buc era il dretg da vegnir informai ad uras giudlunder? Ton il president sco il plevon san mo dir che tochen oz hagi igl uestg buca nominau sur Benny officialmein e quei seigi era la raschun ch'els sappien buca informar ils presents pli concretamein.

Mustér, entschatta matg 2008
Jris Lombris-Manetsch, actuara



foto: G. Tenner

Pader Jean-Marie Frey celebrescha cun la giuventetgna il survetsch divin da s. Stiafen

Rapport dil president dalla pleiv s. Gions

In onn ei puspei vargaus ed il temps ei cheu per presentar il duiv rapport a nossas preziadas parochianas e stimai parochians. Era quei rapport dilucidescha il vargau e lubescha cheutras neginas remeduras. Las informaziuns possibiliteschan la reflectaziun dil vargau, descrivan in techet il present e gidan a ponderar e far patratgs pil futur.

La pastoraziun

La cumposiziun dallas personas dallas suprastonzas dallas pleivs Medel, Sumvitg, Rabiis e Mustér ha lubiu ina lavur effectiva e buna. Decisiuns e discuors communabels ein sesplagai ella tenuta da respect vicendeivel. Pil pli han ils multifars giavischs dallas parochianas e dils parochians saviu vegnir adempli. Igl ei denton biaga dapli giavischs avon maun che pusseivladads da realisar tals.

La lavur da pastoraziun ei vegnida tgamunada da sur Alexi Manetsch cull'assistenza da sur Benny Varghese ed agid dils plevons pensiunai e forzas jastras. Nus exprimim nies sincer „Dieus paghi“ per lur engaschament.

Momentan havein nus ina fetg emperneivla situaziun ella pastoraziun e nossas parochianas e parochians schazegian quei fatg. Sche mo ei stat aunc ditg aschia!

La vesta pigl avegnir ei deplorablamein tenor nies meini meins empermettonta. Las personas che portan responsablada supra semovan el temps preconiliar. La suveranidad digl agen patertgar ed agir duei puspei vegnir canalisada tenor lur meini e vesta. Quella tenuta levgescha buca la pastoraziun a plevons cun fidonza ella responsablada persunala dallas parochianas e dils parochians.

Schebein la via da supprimer in saun patertgar ha success ella globalisaziun da nies temps ei grev da dir. Ei ha num esser attents e sefidar dil bien Diu.



Cumplenu il viadi terrester

Era igl onn vargau ha la mort teniu ina gronda raccolta en nossa pleiv. Igl onn 2008 han 28 personas da nossa pleiv fatg il davos viadi. Nus astgein esser loschs che tontas parochianas e tons parochians assistan als survetschs divins funerals. Quei ei bein in segn da cardientscha e speranza e porta in tec levgera allas personas en cordoli.

Ils 18 da zercladur ha il patrun sur veta e mort clamau siu survient Battesta Deflorin-Levy en siu reginavel. 1990 vegn il trapassau elegius ella suprastonza dalla pleiv sco actuar. Duronts 6 onns fa el quei survetsch cun

engaschament e beinvulientscha pil beinstar da parochianas e parochians dalla spaziusa pleiv. Nus cartein ch'il bien Diu dat ad el la beinmeritada pagaglia ed il ruaus perpeten.



Il 20 da mars 2009 annunzia il zenn grond da sogn Gions la mort dad Emil Manetsch. Il pot ni igl Emil sco el vegneva numnaus ha pia fatg il viadi sur la davosa punt. Duront plirs onn ha igl Emil rendiu il survetsch sco ordinatur per la pleiv sogn Gions e quei cun engaschament cumplein e senza acceptar ina bonificaziun. Il trapassau ha giu in bien e curteseivel humor e derasau bia legria. Nus cartein ch'el sesanfi ussa el liug empermess e ch'el gaudi leu en legria cumpleina il ruaus perpeten.

Nus sperein ed essan perschua di ch'il Diu Tutpussent ei misericordeivels cun nos defuncts e dat ad els il ruaus perpeten. Els ruaussien en pasch!

Festivitads

Sco ils onns precedents ein las festivitads ecclesiasticas en pleiv sesplagadas en fuorma plascheivla ed usitada. La collaboraziun denter pleiv e claustra sebase sin beinvulientscha, respect vicendeivel e la voluntad da porscher agid sch'ei basegna. Adina puspei astgein nus sefidar dil sustegn dils venerabels paders e persuerter essan nus fetg engrazieivels.

La dumengia il 24 d'uost 2008 ei in grond pievel da fiasta serimnaus el sanctuari da s. Roc e s. Bistgaun a Segnas per festivar cun sur Pius Venzin. Gia 25 onns pastorescha quei prudent augsegner a Segnas. El ei il pastur dallas olmas che dat la direenziun clara e decisiva laschond la libertad a mintgin d'anflar sia mira.

Nus sperein ch'il Diu tutpussent regali a sur canoni Pius Venzin ed a sia casarina Mathilda Lutz aunc in tschuppel onns en sanadad. Per tut il prestau admettein nus in profund e sincer „Dieus paghi“!

In eveniment special han nossas parochianas e nos parochians astgau festivar la dumengia il 5 d'october 2008. Il cau diocesan monsignur uestg Vitus Huonder ha visitau nossa pleiv e celebrau la sontga messa. Igl ei ina causa unica ch'in burghais da Mustér ei uestg e nus essan cunscients da quei. Nies fervent giavisch ei deponius tier el. Malgrad tendenzas cuntrarias sperein nus che nossa pleiv astgi era el futur engaschar augsegners aviarts el patertgar ed agir.

La davosa dumengia d'october 2008 ein las parochianas ed ils parochians dallas pleivs da Medel e Mustér serimnai ella parochiala da sogn Gions per prender cumiau da sur Benny Varghese. Suenter plirs onns sco vicari cun pastoraziun ellas pleivs da Medel, Mustér e dalla vischnaunca da Sumvitg/Rabius/Surrein eis el vegnius nominaus plevon administrativ per las pleivs da Sumvitg. El, igl augsegner cun ina tenuta ruasseivla e

plascheivla, cun ina vusch bassa ed emperneivla ei serendius ella vischnaunca vischinonta. Igl augsegner dallas Indias gudeva gronda simpatia, respect ed affecziun tier l'entira populaziun. Nus sperein ch'el sesenti bein en sia pastoraziun e che ses giavischs anflien cumplenida.



La dumengia dils 8 da mars 2009 ha sur Alexi Manetsch astgau festivar siu 65avel anniversari. Las parochianas ed ils parochians da nosssa pleiv, denton era vischinas e vischins ord las pleivs vischinontas ein serimnai ella baselgia parochiala da sogn Gions per festivar quei tiern cul giubilar. Sur Alexi astga mirar anavos sil vargau cun perschuasiun dad haver prestau il siu. Adina puspei ha ei giu num surpender pli bia responsablada. Biars onns alla liunga eis ei mo vegniu adossau pli bia lavur essend che la munconza da spirituals ei sefatga bravamein en nosssa tiara. El ha surpriu e prestau sia lavur. Ussa va quei spiritual cun clars principis, profunda savida, ferma cardientscha en pensiu. Il giubilar ha in dun special da

puttar la buna nova allas visitadras e visitaders dil survetsch divin. El va sia via, ha sias finamiras, dat denton la libertad a scadina persuna d'anflar la via che constat per ella sezza. Nus giavischein al giubilar sanadad e cuntentientscha. Plinavon sperein nus che sias forzas tonschien aunc per pastorar in tshuppel onns la pleiv da sogn Gions, ch'el possi aunc organisar entgins interessants viadis per ils commembers dallas pleivs e ch'il cudez da derasar la buna nova cun spirtus e profunds patratgs resti. In grond „Dieus paghi“ per tut il prestau. Nus giavischein mo il meglier e che ses giavischs mondien en vigur.

Donaziuns

Il temps semida e novas valurs fuolan via e survegnan peisa. Tonaton astgein nus adina puspei retscheiver sustegn finanziel per la tgira ed il manteniment da nos baghetgs sacral. Pil pli vulan quellas donaturas e quels donaturs buca vegnir numnai e nus respectein secapescha quei giavisch. Nus admettein a tuts in sincer e profund engraziament.

Lavar ora la baselgia parochiala s. Gions

Ina paret e valeta singulara presenta nosssa baselgia parochiala da s. Gions. En siu intern semuossan grondas custeivladads culturalas. Las capavlas calustras Agnes Deflorin ed Otilia Hosang tgiran cun quita e savida nies sanctuari.

Inagada ad onn vegn denton fatg „lischiva gronda“. Bein cloma il tuchiez aunc adina vischinas e vischins tier quella lavur communabla, las experientschas dils onns vargai muossan denton che seplidar ed envidar en personas ch'ins ha il sentiment che hagien

il plascher e peda ha purtau buns fretgs. Aschia eis ei pusseivel da schubergiar nossa baselgia el decuors d'in temps raschuneivel. A tuttas gidontras e gidonters admettein nus in sincer engraziament e nus sperein era el futur sin sustegn ed engaschament.

Abdicaziuns

Duront nov onns ha Bernhard Petschen tgamunau il cussegl pastoral. La muntada da quei gremium ei s'augmentada grondamein. Sco iniziand ed ensemen cun las autras persunas da quei cussegl ha el cun agid da sur Alexi ediu e redegii pliras scartiras che vegnan oz duvradas sco schëllas fussen adina stadas cheu. Patertgein nus vid ils texts dil rusari da morts, retscheiver las baras ed aschia vinavon. Bernhard, igl um dalla tecnica, ha era installau e tgirau il link dalla pleiv sigl internet. Tier il pensum da president dil cussegl pastoral audan era lavurs d'organisaziun da devoziuns, d'aperos, da survetschs divins specials ed auter bia. „Dieus paghi“ per tut e mo il meglier pil futur.

15 onns alla liunga ha nies valent revisur Paul Duff revediu ensemen cun siu collega ils multifars quens dalla pleiv s. Gions. Igl ei forsa buca quella endinada lavur dil mintgadi, denton ella ei fetg impurtonta per las fundaziuns e per la pleiv. Las finanzas da mintga communitad ein d'eminenta impurtanza ed ei basegna ina buna revisiun per attestar la seriusa e gesta lavur dils cassiers ed ugaus. Quella lavur ha Paul Duff fatg cun savida e premura. Nus engraziein e giavischein tut bien pigl avegnir.

Plein anim e plascher ha pader Jean-Marie Frey iniziou la devoziun „PraySing“, prender peda in mument per Diu e per nusez. La devoziun ei vegnida visitada da persunas d'in grond intschess e gudeva ina calamita speciala. Ussa banduna il pader nies vitg claustral ed aschia croda deplorablamein era quella devoziun speciala. Nus admettein grond engraziament a pader Jean-Marie e giavischein tut bien pil futur.

Statisticas

Igl onn vargau han 19 affons retschiert il sacrament dil s. batten, da quels habiteschan 10 en vischnaunca (2007: 21 s. batten). En nossa pleiv ein 7 pèrs vegni enzinnai (2007: 3 nozzas). L'emprema s. communiun han 18 affons dalla tiarza classa astgau retscheiver.

Da Tschuncheismas, ils 11 da matg 2008 ha nies preziau avat Daniel Schönbächler cresmau en nossa pleiv. El ha dau quei sacrament a 26 affons dalla 5. classa. Nus essan privilegi dad haver gl'avat en las scheinas da nossa pleiv. Grond engraziament e nies giavisch che quei survetsch sefetsgi era egl avegnir.

La catechesa

Las suandontas persunas han instruiu ductrina en nossas scolas:

- | | |
|------------|-------------------------|
| 1. primara | Martina Gienal-Caviezol |
| 2. primara | Cecilia Flepp-Walder |

3. primara	Sur Alexi Manetsch
4. primara	Martina Gienal-Caviezel
5. primara	Ingrid Flepp-Heshof
6. primara	Olinda Hosang
1. secundara	Beer Rezia/Peng Mathilda tochen ils 20-06-2008 Hosang Aluis naven dils 18-08-2008
2. secundara	Peng Mathilda/Beer Rezia tochen ils 20-06-2008 Tenner Gion naven dils 18-08-2008
3. secundara	Beer Rezia/Peng Mathilda tochen ils 20-06-2008 Venzin Gabriel naven dils 18-08-2008
1. reala	Peng Mathilda/Beer Rezia tochen ils 20-06-2008 Flepp Yvonne naven dils 18-08-2008
2. reala	Beer Rezia/Peng Mathilda tochen ils 20-06-2008 Tenner Gion naven dils 18-08-2008
3. reala	Peng Mathilda/Beer Rezia tochen ils 20-06-2008 Venzin Gabriel naven dils 18-08-2008

Grazia agl engaschament da bunAs e fideivlAs catechetAs havein nus saviu reparter l'instrucziun religiosa tochen il temps dad oz detg stupent e prudent. La formaziun religiosa vegn deplorablamein era cheu tier nus sutvaletada ed ignorada. Igl ei buca sempel d'anflar persunas che surpandan l'instrucziun „etica“ ni „religiosa“ sil scalem ault. Las persunas ch'instrueschan religiun ein veramein visadas sil sustegn dils geniturs e buca meins dallas persunas ell'instrucziun profana sch'ins vul era dar el futur vinavon la buna nova da Cristus.

Viadi culs ministrants e lecturAs

Mintga treis onns paga la pleiv als ministrants in viadi sco engraziament per lur survetschs igl entir onn ora. Il cussegl da scola conceda persunter mintgamai in miez di liber. Aschia ein els stai inaga a Morschach, in'otra gada el Mystery-Park ad Interlaken ed igl onn vargau el Tessin. Cugl auto da posta ein els carrai tochen a Rivera, naven da leu cun pintgas pendicularas sil Monte Tamaro. Si leu sesanfla la bellezza baselgia „Santa Maria degli Angeli“ dil renomau architect Mario Botta. Pli fascinont pils affons era denton la pli liunga via da scursalar la stad en Svizra che ha ina lunghezia da 440 m. Il suentermiezdi han els passentau a Lugano cun far „shopping“. Denton era ils ulteriurs onns survegnan els ina pintga reconuschientscha, p.ex. ina scursalada si Dieni, ir a magliar pizza ni ir a kino. Uonn ein els stai in suentermiezdi a far „Snow-Tubing“ si spel hotel Sax. Quei ch'astga naturalmein mai muncar tier in suentermiezdi cun affons ei ina buna marena. Mintg'onn separticipescha quasi mintgin affon cun plascher vid quellas sentupadas.

Engraziament

La roda dil temps semova en prescha e senza cal. Globalisaziun, innovaziuns, novas structuradas, duvran sinergias ein ils cavazzins che percuoran tuttas medias. Savens savein era nus profitar da quei. Ei resta denton aunc adina duers avunda che basegnan in engaschament da biaras parochianas e biars parochians. Adina puspei astgein nus sefidar da persunas beinvulentas che prestan massa lavur ella tgeudad. Quella tenuta admirabla levgescha la travaglia dils responsabels.

Engraziar auda tier ils pli emperneivels messadis ch'in president astga dar vinavon. Engraziaments persunals han la resca ch'il scribent emblidi enzatgi e che gest quella persuna havess meritau in tal. Per prevegnir a quei fatg selubeschel d'admetter in sincer Dieus paghi a tuttas persunas che han sin in sectur ni l'auter gidau ad organisar, embellir e far survetschs divins ed autras festivitads. Buca emblidar lessel era las numerusas persunas che han cun plaids ed ovras era finanzialas gidau la cuminonza da pleiv.

Nus essan engrazieivels alla cuminonza claustrala per la buna collaboraziun e per il sustegn ch'ils conventuals dattan a nus nua ch'ils basegns semuossa ed igl ei pusseivel.

Nus admettein in sincer Dieus paghi a nies preziau plevon sur Alexi Manetsch, a siu gidonter sur Benny Varghese, a sur Pius Venzin sco era a tut lur gidonters.

Bia buna e fritgeivla lavur vegn prestada sil sectur social, liturgic, funeral ed ella catechesa e persunter engraziament e compliment. Engraziar lessel era allas persunas che han bien quitau da nos sanctuaris, tgeran la paramenta e che mantegnan e tgeran il cant sacral.

Ei regia in'emperneivla e buna collaboraziun denter ils representants ufficials da nossa vischnaunca ed ils commembers da suprastonza dalla pleiv. Quei fatg lubescha in spert agir. Cheutras san incaricas communablas vegnir realisadas en cuort temps. Nus sperein ch'era egl avegnir sespleighien las incumbensas da tala maniera ed engraziein per tut sustegn.

Mintga communitad tschenta a sesezza finamiras. Il final ei denton mo lu cuntunschibels sche las commembras ed ils commembers lavuran ensemen. Nus havein pil pli cuntunschiu nos finals quei denton mo grazia all'exemplarica, digna, seriosa, beinvulenta ed efficazia lavur da mes consuprastonts. Mintgina e mintgin exequescha sia scharscha exemplaricamein e persunter exprimel jeu miu profund e sincer engraziament.

Nies giavisch ei ch'il Diu tutpussent pertgiri nus da mals dil tgerip e dall'olma e ch'el detti a nus la forza da dumignar il dafar dil mintgadi.

Mustér, mars 2009

Otto Gienal, president dalla pleiv

Rapport dil cussegl pastoral dalla Pleiv Sogn Gions

Preziadas parochianas, preziai parochians

Avon in onn ha il cussegl pastoral stuiu prender encunter pliras demissiuns. Deplorablamein eis ei buca reussiu da remplazzar ils commembers partents. Aschia ha ei giu num da luvrar vinavon cun in cussegl pastoral fetg reduciu. Mo grazia al grond engaschi dils 7 commembers eis ei reussiu a nus d'ademplier nies pensum en favur dalla baselgia e da nossa pleiv. Il cussegl pastoral dalla pleiv Mustér ei in organ ecclesiastic che cussegla e sustegn ils plevons en damondas da pastoraziun.

Il cussegl pastoral Mustér secumpona da 2 cerchels:

- a) Cerchel liturgic: Sia incarica ei da segidar surtut en activitads che pertuccan la pastoraziun, las fiastas ecclesiasticas e survetschs divins specials. Al cerchel liturgic ein era las differentas gruppas suttamessas.
- b) Cerchel social-caritativ: Siu engaschi principal ei la lavur per nossas senioras e seniors cun organisar durant igl onn entginas sentupadas.

Denton dat ei era differentas occasiuns nua che tut ils commembers lavuran ensemen, aschia tier il di da suppa, aperitivs eav. Il cussegl pastoral astga mirar anavos sin in onn cun differentas activitads specialas:

- Devoziun da rogaziun federala en claustra
- Messa da s. Hubertus
- Survetsch divin cun Sontgaclau
- Saults meditativs d'Advent
- Nadal cun ils premcommunicants
- Di da suppa 2009

Rogaziun federala

Il convent dalla claustra ha organisau a caschun dalla dumengia da Rogaziun federala, ils 21 da settember 2008, in suentermiezdi d'oraziun ed adoraziun. La gruppa da devoziuns dil cussegl pastoral ha astgau preparar e menar la devoziun suentermiezdi. Tema: Igl apiestel s.Paul. Igl onn 2008 eis ei stau 2000 onns dapi la naschientscha da quei grond apiestel e missiunari.

Messa da s. Hubertus

Sco ils davos onns ha il cussegl pastoral ensemen cun l'uniun da catschadurs Péz Alpetta organisau in survetsch divin en honor da s. Hubertus, il patrun dils catschadurs. La gruppa da sunacorns Badus Tujetsch ed il chor dall'uniun da catschadurs Tödi Trun han

embelliu il survetsch divin cun musica e cant. Ils commembers dall'uniun Péz Alpetta han ornau la baselgia cun lur trofeas. Suenter messa ein tuts stai envidai ad in aperitiv en halla Cons offerius dall'uniun da catschadurs Péz Alpetta e dil cussegl pastoral. Era durant igl aperitiv han ils sunacorns delectau ils presents cun melodias da catscha.

Adoraziun tgeua

Dapi enzaconts onns eis ei usit dad envidar en ils parochians l'emprema dumengia d'Advent da far ina viseta en baselgia per star leu in mument en oraziun e silenzi avon il Sontgissim exponiu. La musica meditativa e las numerusas candeilas ardentas procuran per in ambient singular, in liug da silenzi e reflexiun.

Survetsch divin da Sontgaclau

Era uonn ha nies plevon sur Alexi ensemen cun il cussegl pastoral envidau en tut las suitas da Sontgaclau dalla vischnaunca da Mustér ad in survetsch divin avon che semetter sin via en las casas ed en las famiglias. Ei ha fatg plascher che 5 fracziuns han dau suatientscha a quei invit, numnadamein las fracziuns da Funs/Latis/Clavaniev, da Gonda/s.Gions/Dulezi, da Raveras, da Segnas/Acletta e da Mompé Medel. Igl ei stau in bi maletg cun tut ils Sontgaclus e lur suite entuorn igl altar. Ina baselgia fullanada ha priu part da quei bi survetsch divin. Il recav dall'unfrenda ei vegnius partius sin las suitas da Sontgaclau presentas. Cun la benedicziun da sur Alexi ein ils Sontgaclus vegni tarmess ora en las famiglias.

Saults meditativs d'Advent

Ils 12 da december 2008 ha il cussegl pastoral envidau ad ina sera cun saults meditativs d'Advent el Center Aua Viva Mustér. En il temps hectic e plein prescha avon Nadal duessen ins era prender peda per in tec ruaus e guder in cuort mument en meditaziun e moviment. Menadra ei dunna Müggler da Malans stada. Deplorablamein han paucas persunas priu part da quella purschida. Forsa eis ei stau la malaura ni era auters termins che han impediù da vegnir. Mo nus lein sespruar dad organisar era uonn aschia ina sera. Dunna Müggler fuss promta da turnar a Mustér.

Nadal cun il premcommunicants

Per la fiasta da Nadal, ils 24 da december 2008, ha sur Alexi preparau in survetsch divin da famiglia cun la 3. classa, pia ils premcommunicants. La fiasta da Nadal ei ina fiasta da legria e quei sentan ins bein era en ils survetschs divins. La baselgia bein ornada cun la stalla ed ils pigeuls e lu ils affons ch'embelleschan cun lur sempladad, plascher ed anim il survetsch divin. Quei fa adina puspei impressiun.

Di da suppa

Ils 22 da mars 2009 ha il cussegl pastoral envidau la populaziun ad in mudest gentar en halla Cons. Onn per onn sentaupa in grond diember da parochians, pign e grond, giuven e vegl per parter simbolicamein quella tschavera cun quels che piteschan fom e miseria. Il recav ei ius uonn a Pader Silvio Deragisch per sia lavur cun impedi.

PraySing – prender peda per Diu e per nusezs

Pader Jean-Marie Frey dalla claustra Mustér ha mintga meins envidau ad in'ura d'oraziun en baselgia s. Gions. Cun cant, silenzi ed oraziun avon il Sontgissim exponiu ha P. Jean-Marie animau ils presents da purtar lur supplicas, quitaus e giavischs persunals avon Diu. Priu part da quella biala devoziun han adina puspei famiglias cun lur affons, persunas ord nossa pleiv mo era d'ordlunder. Suenten la devoziun ein tuts stai envidai ad ina sentupada en la cafeteria dalla Casa s. Gions cun caffè e petta. In grond engraziament a tut tgi ch'ei segidau tier quellas devoziuns e sentupadas.

Deplorablamein ha P. Jean-Marie bandunau la claustra da Mustér per serender en ina claustra a Bad Wimpfen en Tiaratudestga. Nus deplorein quei zun fetg, mo nus lessen admetter a P. Jean-Marie in cordial Dieus paghi per siu engaschi en nossa pleiv e giavischar ad el tut bien en sia nova sfida.

Caras parochianas, cars parochians

Sco gia menziunau all'entschatta da miu rapport eis ei buca reussiu a nus d'anflar gidonters per cumpletar il cussegl pastoral. Biars ein gia surcargai cun lavur ed incaricas, auters han semplamein negina peda ni negin interess da s'engaschar en uniuns ni organisaziuns. Mo senza igl engaschi da voluntaris eis ei buca pusseivel da menar in'uniun. Quei vala era per ils organs ecclesiastics. Perquei appeleschel jeu a vus, caras lecturas e cars lecturs, da dar in stausch e s'engaschar tenor vossas pusseivladads tier ina gruppa ni l'autra per aschia saver luvrar optimal per nossa baselgia, nossa pleiv e vischnaunca. Sulet vies interess e sustegn, vossa participaziun als survetschs divins e devoziuns, vies engaschi en favur dalla baselgia e pleiv segireschan ina cuntinuaziun da nossa lavur.

Il cerchel liturgic

Duront igl onn 2008 han ils commembers dil Cerchel liturgic segidau tier las usitadas fiastas ecclesiasticas, seigi quei cun reparter candeilas, preparar ed organisar las processions, reparter palmas ed auter. Tier differents survetschs divins e devoziuns han ils commembers era segidau e susteniu nies plevon sur Alexi. Il preparar la documentaziun e reparter la documentaziun da cureisma, rimnar e dumbrar l'unfrenda da cureisma, far si pigniel e preparar la baselgia per la fiasta da Nadal ein era incaricas dil cerchel liturgic.

Las differentas gruppas

La “Gruppa da devoziuns” cun sora Beatrice Desax, Laurenzia Gadola, Ingrid Flepp e Laurenzia Cajacob sesprova dad organisar e menar devoziuns cun temas actuals tenor fiastas ecclesiasticas. Ils 15 d’uost ei danovamein stau ina devoziun ensemen cun sur Pius Venzin en la caplutta da Nossadunna ad Acletta. Nus deplorein ch’il diember da parochians che prendan part a nossas devoziun vegn adina pli e pli pigns. Nus lessen animar da prender pli stedi part a quellas devoziuns.

Alla “ Gruppa da rusari da morts” fan part: Laurenzia Gadola, Rita Furger, Catrina Steger, Benjamin Schuoler e Laurenzia Cajacob.

Il rusari da morts vegn mintgamai recitau la sera allas 20.00 uras. Sonda sera ei negin rusari. Il “Salid da Nossadunna” meinan Laurenzia Gadola e Claudia Deflorin mintgamai il davos gliendisdis dil meins.

La gruppa “Retscheiver la bara” cun Marcellina Giger, Agnes Deflorin, Laurenzia Schnoz e Laurenzia Cajacob ei adina presenta cun duas persunas cu ina bara vegn purtada en baselgia. Cun ina cuorta devoziun lessen ellas far oraziun per il/la defunct/a e sustener la famiglia en malencurada en quei grev mument.

Il cerchel social-caritativ

La menadra dil cerchel social-caritativ, Laurenzia Schnoz, rapporta:

Sco mintg’onn havein nus menau atras nossas sentupadas pils seniors. Il mars ed igl avrel havein nus dau troccas, jass ed auters giugs culs scolars e las scholaras dil scalem superiur e nos seniors. Il matg ei stau ina devoziun pils seniors si Segnas, silsunter marena ell’ustria Cresta. Igl october ei stau uncziun dils malsauens ed attempai sin claustra, nua ch’ei ha gest era dau ina buna marena. Il november havein nus organisau in gentar d’Advent. Nossa davosa sentupada ei stada el hotel Sax cun lotto. Igl ustier offerescha mintg’onn in pushegn als presents, quei che nus lein era menziunar inaga ed engraziar persunter. Nus havein saviu porscher mo in mudest program demai ch’ei maunca a nus gidonters e gidontras. Ei fagess plascher sche pli biars prendessen part a nossas sentupadas.

Rapport dalla gruppa “Salid dil Segner”

La responsabla dalla gruppa Corina Defuns rapporta:

Affons naven dalla scoletta entochen la tiarza classa han priu part cun plascher e gronda premura als survetschs divins preeucaristics che nus numnein „Salid dil Segner“. El center dallas devoziuns stattan raquents sur dil Bab en tschiel ed ord la veta da Jesus ed ils sogns.

Lentschatta october han ils affons accumulau nies uestg Vitus Huonder naven dalla casa pervenda en baselgia e cantau leu per el ina canzun da salid e beinvegni.

Per la tiarza dumengia d'Advent han ils affons preparau, ensemen cun lur menadras, ina devoziun en baselgia. La historia „Il zennet da Nadal“, ch'ei stada el center da quella sentupada ha tschaffau e fascinau ils affons. Ella raquenta d'ina buoba ch'anfla sin via in zennet d'argen ed enquera il possessur. Sulet la veglia dunna Ruth sa che quei zennet ei destinaus per in affon tut aparti che vegn lu gleiti a nescher. Ensemen culs pasturs arriva la buoba ella stalla da Betlehem e capescha immediat ch'il zennet ei siu schenghetg pil bambin. En biaras stivas resuna aunc oz in zennet cura che pigniel e schenghetgs ein semtgai.

Suenter la devoziun dall'entschatta fevrer ein ils affons serendi en baselgia per retscheiver la benedicziun dalla gula.

Ils 8 da mars ha la grupp dil „Salid dil Segner“ purtau en baselgia salids ed auguris a sur Alexi per siu 65avel natalezi. Il model dalla baselgia tarlischonta, piazzada amiez nossa baselgia parochiala ed ils radis da colur ein stai in simbol per la gronda irradiaziun che nies plevon ha giu en tut ses onns da pastoraziun sin ils fideivels da nossa vischnaunca.

Ils survetschs divins preecuaristics vegnan preparai da Marie-Rose Deflorin, Corina Defuns, Irene Huonder e Regula Manetsch.

Quella grupp s'entaupa pliras gadas ad onn per coordinar ed organisar termins e per preparar ils survetschs divins pils affons. Quels han liug l'emprema dumengia dil meins naven dil settember entochen Dumengia da Palmas.

Engraziament

Cun bia malsegirtad e sceptica hai jeu surpriu avon in onn il presidi dil cussegl pastoral. Jeu hai denton survegniu grond sustegn da sur Alexi, dals commembers dil cussegl pastoral e dalla suprastanza dalla pleiv s. Gions.

Quei ei stau per mei in fetg grond agid. A tuts quels lessel jeu dir in cordial Dieus paghi per lur sustegn.

Mo jeu lessel era engraziar da tut cor a tut quels ch'ein s'engaschai sin ina moda ni l'autra en nossa pleiv, a tut quels che han visitau ils survetschs divins, rusaris e devoziuns.

In special Dieus paghi a nies plevon sur Alexi Manetsch che ha adina susteniu nus cun plaid e fatg.

Als commembers dil cussegl pastoral cordial engraziament per lur engaschi, la buna lavur e la biala collaboraziun.

En miu engraziament ensiarel jeu era la secretaria dalla pleiv Jris Lombris e las calustras Agnes Deflorin ed Otilia Hosang ch'ein adina promtas da segidar e cussegliar.

A tut ils commembers dil cerchel liturgic, a tut quels che fan part ad ina dallas gruppas ed a tut tgi che ha segidau sin ina moda ni l'autra per il beinreussir da nossa lavur in sincer Dieus paghi per lur engaschi.

*“Savens stgirentan nibels nossa via dalla cardientscha –
mo seigies ruasseiverls, sur ils nibels resplenda il sulegl. »*

Cun quels plaids lessel concluder miu rapport e giavischar a vus ch' il sulegl possi
penetrar ils nibels.

Mustér, mars 2009

Laurenzia Cajacob, presidenta



foto: C. Defuns

La grupp dil Salid dil Segner

Rapport dalla caplania da Segnas

Igl onn 2008 ei stau in onn ruasseivel per la suprastonza dalla caplania da Segnas. Sper las fatschentas usitadas ha ei giu num preparar da schar refrestgentar ils mirs interns dalla baselgia. Quella lavur ei cunzun stada centrada sin la tscherca da finanzas per cuvierer ils cuosts. Il resun da parochianas e parochians da nossa pleiv, mo era d'ordlunder ei staus zun positivs. Gest plirs mellis francs vein nus astgau rimnar. La summa a disposiziun tonscha denton aunc ditg buca per las lavurs vid l'orgla che fa bein enqual quita. Igl instrument basignass urgent ina schubergiada totala ed in'adattaziun all'acustica dalla baselgia. Rodund 20'000 frs. ein rimnai, quei ei in quart dalla summa offerida entras la firma Mathis a Näfels.

Sogn Roc 1983 ei stau in grond di pil vitget e la caplania da Segnas. Suenten entgens discuors eis ei stau pusseivel alla suprastonza da gliez temps dad installar sur Pius Venzin, da gliez temps plevon a Vrin, sco niev caplon da Segnas. Beinenqualin profet veva predetg che Segnas vegni mai pli a survegnir in pastur dallas olmas, quei suenter la mort da sur Giusep Durschei. Ton pli gronda ei la legria stada cu sur Pius e sia casarina Mathilda Lutz han dau suatientscha da vegnir e star a Segnas. Per omisdus ei la midada da domicil staus in retuorn: per sur Pius in retuorn in siu liug da scola e sia patria, per Mathilda Lutz in retuorn medemamein ella patria, silmeins ella regiun, ella ch'ei burgheisa e carschida si a Medel/Lucmagn.

Ils onns vargan ed ils temps semidan – en casa pervenda ed en baselgia. Per cletg buca tuttina, pertgei ils bauns vits vessen lu era stuiu caschunar largias en casa pervenda. Mo quei ei grazia al Tutpussent buc il cass. Cun legria han buca mo ils da Segnas, mobein l'entira pleiv da Mustér astgau festivar Sogn Roc 2008 il giubileum da 25 onns lavur activa en pleiv da sur Pius e dunna Mathilda Lutz. Franc ha il temps schau anavos lur fastitgs e sur Pius e sia casarina ein vegni pli vegls. Mintgaton splunta la vegliadetgna en fuorma d'in mal ni l'auter. Mo omisdus laian buca stermentar ed ein aunc oz ferms sin comba. Sur Pius ei da di e da notg cheu per sias olmas e sia casarina procura sco ella sa e po per il beinstar dad els dus. Sogn Roc 2008 ei stau nossa caschun d'engraziar ad els dus per quella gronda lavur! In grond pievel ei vegnius a Segnas per demussar reverenza ed engraziament. Nus tuts sperein ch'ils dus giubilars hagian giu plascher da quella pintga fiasta da renconuschientscha era sche nus savein fetg bein che tonta lavur e suffrientscha selaian buca pagar. Nus sperein denton era ch'il bien Diu vegni e remunerar tutta lavur in di tier el ella patria celestia. En mintga cass giavischein nus a Vus dus, preziau sur Pius e preziada Mathilda, biars dis ed onns en cumpleina sanadad. Nus essan mudests e duvrein buc in caplon en piazza cumpleina: nus essan engrazieivels da ver Vus denter nus era sche la vegliadetgna lubescha buca pli tut. La casa pervenda a Segnas ei daventada Vies dacasa terreste e duei restar aschia tochen alla sava dil dacasa celestia.

Inagada dapli astgel jeu perquei engraziari a Vus sur Pius per tutta lavur, per l'oraziun, ils buns cussegls e tuts survetschs che Vus fageis per caplania e pleiv. Il medem engraziament

admettel era a casarina Mathilda Lutz, beinsavend che senza Vus fuss la casa pervenda buc quei ch'ella ei.

Inagada ha il zenn grond dalla baselgia da Segnas giu d'annunziar la tresta nova dalla mort d'ina convischina. Il Signur sur veta e mort ha clamau tier el ils 5 da december 2008 Anna Maria Desax –Deplazes. Ils davos onns ha ella giu sia dimora en casa s. Gions nua ch'ella ha astgau guder ina biala sera dalla veta.

In fervent Dieus paghi admettel era a nosssa zun premurada calustra Barla Jacomet ed a tut quellas e quels che segidan duront igl onn ora sin ina moda ni l'autra per che nosssa cuminonza da caplania e pleiv funcziuneschi.

Segnas, fevrer 2009
Gion Tenner, president



Benedicziun finala a caschun dalla fiasta da s. Roc a Segnas

Quen dalla baselgia parochiala s. Gions 2008

Entradas		
unfrendas	21'950.80	
donaziuns	4'530.55	
contribuziun pleiv s. Gions	8'000.00	
fondo messas fundadas	20'000.00	
diever baselgia, concerts etc.	1'000.00	
tscheins da capital	988.80	
restituziun taglia anticipada	490.75	
tscheins dretg alp Cristallina	350.00	
total entradas	57'310.90	
Expensas		
uorden per il survetsch divin	2'147.10	
embelliment dalla baselgia (flurs, candeilas)	4'050.80	
assicuranza da baghetgs	1'490.50	
assicuranza digl inventar	4'801.70	
assicuranza da responsabladad	150.60	
rätia energia ag, scaldament, glisch	5'864.55	
cudischs	663.00	
publicaziuns FUS, etc.	2'017.65	
abonnements per manteniment d'apparaturas	979.20	
divers quens da reparaturas e manteniment	10'300.10	
diversas expensas	1'102.20	
viadi ministrants	1'200.00	
honorar ordinaturs	1'100.00	
contribuziun chor baselgia	2'000.00	
taxa fundamentala da rumians, aua, canal., segirada da fiug	2'322.30	
spesas da banca	183.60	
total expensas	40'373.30	
total entradas 2008	57'310.90	
total expensas 2008		40'373.30
surpli entradas 2008	16'937.60	

Bilanza per ils 31 da december 2008

Activa

conto da spargn	46'513.67
obligaziun da cassa 2 %, croda 01.03.2009	20'000.00
obligaziun da cassa 2 ¼%, croda 24.01.2009	10'000.00
obligaziun da cassa 2 ¼%, croda 10.01.2010	20'000.00
obligaziun da cassa 2 7/8, croda 08.01.2013	40'000.00
<i>total activa ils 31-12-2008</i>	<i>136'513.67</i>

moviment dalla facultad 2008

facultad ils 31-12-2007	119'576.07
facultad ils 31-12-2008	136'513.67
<i>augment dalla facultad</i>	<i>16'937.60</i>

Mustér, ils 7 da schaner 2009

Battista Tschuor. ugau-baselgia

Quen dalla pervenda da s. Gions per 2008

	31-12-2008	31-12-2007
Salaris pleiv Mustér	226'624.15	231'847.25
salaris pleiv Mustér	76'924.20	79'069.90
salaris personal gidonter	63'475.40	67'050.75
indemisaziun suprastonza	10'499.20	9'750.00
indemisaziun per substituziun	5'161.70	3'942.15
contribuziun per ductrina	49'289.35	48'277.85
contribuziun SVS	14'069.80	13'843.05
segiradas d'accident	2'057.10	2'189.65
cassa da pensiu	5'147.40	7'723.90
<i>Contribuziuns</i>	107'755.60	41'163.10
diversas contribuziuns	2'255.60	2'963.10
baselgia s. Gions	88'000.00	8'000.00
baselgia Sogn Placi		5'000.00
caplutta Mompé Tujetsch		12'000.00
baselgia s. Bistgaun e s. Roc, Segnas	10'000.00	8'000.00
caplutta Pardomat		-2'300.00
contribuziun baselgia cantunala	1'000.00	1'000.00
contribuziun al cussegl pastoral	4'000.00	4'000.00
contribuziun ad instituziuns culturalas (Campinos)	2'500.00	2'500.00
<i>Funs ed immobilias</i>	7'000.90	8'690.45
manteniment casa pervenda	868.30	2'179.10
manteniment indrez casa pervenda	954.30	2'490.55
taxas: serenera, canalisaziun, aua e rumians	1'816.95	1'807.20
electrizitad casa pervenda	155.05	
segiradas casa pervenda	727.65	1'094.95
segiradas casa pervenda veglia	789.70	364.35
divers cuosts da schischom	35.95	-7.55
ieli casa pervenda	1'653.00	761.85
<i>Caplania Segnas</i>	54'898.00	70'510.00
salaris caplania Segnas	19'999.80	19'999.80
salaris personal gidonter	30'488.20	29'950.20
taxas: serenera, canalisaziun, aua e rumians	658.85	645.20

assicuranza da baghetgs	713.90	673.75
contribuziun SVS	649.00	397.35
segiradas d'accident	307.10	290.80
manteniment casa pervenda	2'081.15	18'552.90
<i>Diversa</i>	9'926.95	8'534.05
material da biro	463.15	1'221.85
apparaturas da biro	2'080.00	
spesas da banca	323.30	336.30
telefon, spesas da porto etc.	629.70	939.85
cuosts da publicaziun	2'886.85	2'866.60
radunonza generala	1'424.35	1'593.30
spesas suprastonza	851.90	
archiv		160.00
diversas expensas	1'267.70	1'416.15
<i>total expensas</i>	406'205.60	360'744.85
taglias / contribuziuns	399'140.25	377'389.90
taglia pleiv	391'640.25	369'889.90
vischnaunca per cuosts ductrina	7'500.00	7'500.00
tscheins	19'945.95	17'409.55
tscheins activs	7'407.95	4'091.55
tscheins casa pervenda	11'940.00	12'720.00
tscheins schischom	598.00	598.00
<i>total entradas</i>	419'086.20	394'799.45
<i>total expensas per 2008</i>	406'205.60	360'744.85
<i>total entradas per 2008</i>	419'086.20	394'799.45
<i>surpli entradas per 2008</i>	12'880.60	34'054.60

Bilanza dils 31 da december 2008

Activas	31-12-2008	31-12-2007
<i>total mieds finanzials</i>		
contocorrents	13'462.40	5'776.45
contos da spargn	262'197.50	282'136.40
daner da termin	200'000.00	100'000.00
assegn Banca Raiffeisen	200.00	200.00
taglia anticipada	2'592.70	1'412.90
activas transitoricas	6'133.55	
 <i>total mieds administrativs</i>		
casa pervenda	1.00	1.00
casa pervenda veglia	1.00	1.00
casa pervenda Segnas	1.00	1.00
schischom Dulezi	1.00	1.00
schischom e clavau Acla da Fontauna	1.00	1.00
<i>total activas</i>	<i>484'591.15</i>	<i>389'530.75</i>
Passivas		
passivas transitoricas	95'114.10	12'934.30
capital agen	376'596.45	342'541.85
gudogn	12'880.60	34'054.60
<i>total passivas</i>	<i>484'591.15</i>	<i>389'530.75</i>

Mustér, ils 2 da fevrer 2009
Willi Lozza, ugau-pervenda

Facultad e deivets dils fondos da baselgias e capluttas

Baselgia parochiala s. Gion Battesta fondo baselgia s. Gions fondo messas fundadas s. Gions	ugau: Battesta Tschuor	136'513.67 273'264.85
Baselgia s. Placi fondo baselgia s. Placi	ugau: Battesta Tschuor	23'024.71
Baselgia s. Gada fondo baselgia s. Gada	ugau: Battesta Tschuor	293'149.56
Baselgia da Nossadunna, Acletta fondo baselgia	ugau: Corsin Maissen	40'305.30
Baselgia s. Bistgaun e s. Roc, Segnas fondo baselgia fondo messas fundadas	ugadessa: Letizia Duff-Sac	76'404.20 111'268.40
Caplutta Sontgaclau, Mompé Tujetsch fondo caplutta deivet restont	ugau: Manetsch Sigisbert	10'265.75 40'000.00
Caplutta s. Valentin, Mompé Medel fondo caplutta	ugau: Baseli Jacomet	17'317.10
Caplutta s. Antieni, Perdomat fondo caplutta	ugau: Christian Duff	18'221.90
Caplutta s. Leci, Disla fondo caplutta	ugau: Max Deplazes	10'385.36
Caplutta s. Giachen, Cuoz fondo caplutta	ugau: Ignaz Deflorin	46'325.80

Rapport dils revisurs

Il sutsignai revisurs han, tenor incarica digl artechel 28 dalla constituziun dalla pleiv s. Gions, revediu ils quens ed il menaschi finanziel dalla pervenda, dalla baselgia parochiala e dallas capluttas dalla pleiv. Ella seduta dils 6 da mars ein quels vegni presentai e revedi.

Per mauns dalla radunonza generala dein nus revisurs il suandont rapport:

1. Las cudischaziuns ein accumpignadas dils mussaments necessaris.
2. Ils saldis da cassa, schec postal e conto da banca corrispundan culs attests mussai ora.
3. Las vaglias cudischadas ein avon maun.
4. Las expensas ein fatgas tenor conclus dalla radunonza generala sin fundament dils preventivs. Las ulteriuras expensas ein vegnidas decididas dalla suprastonza tenor las cumpetenzas dalla constituziun.

Nus fagein alla radunonza generala las suandontas propostas:

- a) D'approbar bilanza e quen administrativ per ils 31 da december 2008 dalla pervenda, dalla baselgia parochiala s. Gions e dallas capluttas tenor las cefras presentadas.
- b) Da dar scarica alla suprastonza ed als funcziunaris.
- c) D'exprimer in meritau engraziament alla suprastonza, als augsegners ed a tuts ugas per lur nunstunclenteivel engaschament.

Mustér, mars 2009

Francescg Cajacob e Roger Sac, revisurs da quen

Preventiv dalla baselgia parochiala s. Gions per 2009

Entradas		
unfrendas	20'000.00	
contribuziun pleiv	8'000.00	
fondo messas fundadas	10'000.00	
tscheins da capital	1'000.00	
taglia anticipada	700.00	
tscheins dretg alp Cristallina	300.00	
total entradas	40'000.00	
Expensas		
uorden per il survetsch divin		3'000.00
embelliment dalla baselgia parochiala		4'000.00
assicuranza da baghetgs		1'500.00
assicuranza digl inventar		4'800.00
assicuranza da responsabladad		200.00
energia, scaldament, glisch		7'000.00
publicaziuns FUS		1'900.00
abonnaments per manteniment d'apparaturas		900.00
contribuziun chor baselgia		2'000.00
taxa fundamentala da rumians, canalisaziun, aua, segirada da fiug		2'400.00
honorar ordinaturs		1'300.00
expensas nunpredidas		7'000.00
total expensas		36'000.00
total entradas 2009	40'000.00	
total expensas 2009		36'000.00
surpli entradas 2009	4'000.00	

Mustér, ils 28 da november 2008

Battista Tschuor, ugau baselgia

Preventiv dalla pervenda da s. Gions, per 2009

Salaris	246'400.00
salaris pleiv Mustér	68'000.00
salaris persunal gidonter	67'500.00
indemisaziun per substituziun	20'000.00
indemisaziun suprastonza	10'000.00
contribuziun per ductrina	60'000.00
contribuziun SVS	11'000.00
segiradas d'accident e malsogna	4'500.00
cassa da pensium	5'400.00
Contribuziuns	18'500.00
baselgia s. Gions	8'000.00
contribuziun al cussegl pastoral	4'000.00
contribuziun ad instituziuns culturalas	1'000.00
diversas contribuziuns	3'000.00
contribuziun „Camps Cadi“	2'500.00
Funs ed immobilias	16'600.00
manteniment casas pervenda	4'000.00
manteniment indrezs casas pervenda	4'000.00
segiradas, diversas taxas casa pervenda	3'000.00
segiradas, diversas taxas casa pervenda veglia	2'000.00
divers cuosts da schischom	600.00
ieli casa pervenda	3'000.00
Caplania Segnas	64'200.00
salaris caplania Segnas	20'000.00
salaris persunal gidonter	31'200.00
indemisaziun per substituziun	500.00
contribuziun SVS	1'500.00
segiradas d'accident e malsogna	1'000.00
manteniment casa pervenda	8'000.00
assicuranzas, diversas taxas	2'000.00
Diversa	11'500.00
material da biro	1'000.00

spesas da banca		500.00
spesas da porto		1'000.00
spesas da telefon		500.00
cuosts da publicaziun		3'000.00
radunonza generala		2'000.00
archiv		500.00
diversas expensas		3'000.00
<i>total expensas</i>		357'200.00
taglias / contribuziuns	348'700.00	
taglia pleiv	340'000.00	
vischnaunca per cuosts ductrina	7'500.00	
pleiv Medel per ductrina	1'200.00	
tscheins	16'200.00	
tscheins activs	6'000.00	
tscheins casa pervenda	9'600.00	
tscheins schischom	600.00	
<i>total entradas</i>	364'900.00	
<i>total entradas per 2009</i>	364'900.00	
<i>total expensas per 2009</i>		357'200.00
<i>surpli entradas per 2009</i>	7'700.00	

Mustér, ils 29 da schaner 2009
Willi Lozza, ugau pervenda

Fixaziun dil pei da taglia per 2010

La suprastonza dalla pleiv s. Gions ed ils revisurs da quen proponan alla radunonza generala dalla pleiv s. Gions/Mustér da fixar il pei da taglia sco suonda:

Per igl onn 2010 vegn il pei da taglia fixaus
sin 12 % digl importo dalla taglia sempla dil cantun

Ufficials dalla pleiv sogn Gions

1. **Suprastonza dalla pleiv s. Gions/Mustér**
Gienal Otto, president
Manetsch Alexi, plevon (ex off.)
Cajacob Laurenzia, cussegl pastoral
Tschuor Battesta, ugau-baselgia
Lozza Willi, ugau-pervenda
Lombris Jris, actuaara e vicepresidentea
Tenner Gion, president dalla caplania Segnas

 2. **Revisurs da quen**
Cajacob Francestg
Sac Roger

 3. **Suprastonza dalla caplania Segnas**
Tenner Gion, president
Venzin Pius, caplon (ex off.)
Duff-Sac Letizia, ugadessa-baselgia
Loretz-Huonder Alberta, actuaara
Monn Linus, ugau-pervenda
Berther Claudius, revisur da quen
Deflorin Adrian, revisur da quen

 4. **Suprastonza dalla caplania Cavardiras**
Labàs Christina, presidenta
Sabbadini Giovanni, ugau-baselgia
Hess Eveline, ugadessa-pervenda
Tschuor Luis, revisur da quen
Schmed Adolf, revisur da quen

 5. **Ugaus caplutta**

s. Gada	Tschuor Battesta
s. Placi	Tschuor Battesta
Acletta	Maissen Corsin
Mompé Tujetsch	Manetsch Sigisbert
Cuoz	Deflorin Ignaz
Mompé Medel	Jacomet Baseli
Perdomat	Duff Christian
-

Madernal
Disla
s. Catrina

Claustra Mustér
Deplazes Max
Condrau Pius

6. Commembers dil cussegl pastoral dalla pleiv s. Gions/Mustér:

a) Comite

Manetsch Alexi, plevon
Cajacob Laurenzia, presidenta
Casanova Ermelinda, actua e vicepresidenta
Deflorin Marie Luise, cassiera
Schnoz Laurenzia, assessura

b). Cerchel liturgic

Cajacob Laurenzia, menadra
Buschor Josef
Caduff-Kneidinger Giusep
Casanova Ermelinda
Duff Giusep

c) Cerchel social-caritativ

Schnoz Laurenzia, menadra
Deflorin Marie Luise

P.P.

7180 Disentis/Mustér